



Komunikadu Imprensa
Parlamentu Nasionál
02 Jullu 2020

JSMP apresia ho métodu abertu no partisipativu ne'ebé Komisaun A, PN aplika durante diskusaun especialidade ba projetu Lei Anti Korrupsaun iha Manufahi

Komisaun A Parlamentu Nasionál iha loron 24-26 Juñu 2020 halo diskusaun no votasaun iha especialidade ba Projetu Lei Nú. I/V/2019 kona-ba Lei Anti Korrupsaun iha Same, munisipiu Manufahi. Diskusaun ne'e konsentra ba iha Títulu I kona-ba Medida Preventiva ba Kombate Korrupsaun iha Kapítulu I no Kapítulu II kona-ba medida Jerál ba Prevensaun no Rejime Deklarasaun ba Bens no Interesse.

Komisaun A konvida mós instituisaun relevante sira hodi partisipa no fó hanoin iha diskusaun ne'e mak hanesan Ministériu Justisa (MJ), Komisaun Anti Korrupsaun (KAK), Polísia Sientífiku Investigasaun Kriminál (PCIC), Provedoria Direitu Umanu no Justisa no Judicial System Monitoring Programme (JSMP). Representante sira husi instituisaun relevante sira ne'e partisipativu hodi hato'o sira-nia observasaun, hanoin no rekomendasaun ba provizaun sira ne'ebé propoin iha kada artigu.

“JSMP apresia aas tebes iniciativa Komisaun A hodi envolve parte interesadu no relevante sira iha diskusaun ba projetu Lei Anti Korrupsaun ne'e. Ida ne'e konsidera nu'udar avansu estraordinária iha setór lejizlativu nian relativamente ba promove partisipasaun públiku iha prosesu halo lei. JSMP husu mós ba iha Komisaun Espesiliazada Permanente sira seluk bele adota métodu ida ne'e bainhira sira halo diskusaun ba lei sira relevante ba sira nia área serbisu, nune'e lei sira ne'e bele refleta ho di'ak realidade ne'ebé iha”, dehan Diretora Ezekutiva JSMP, Sra. Ana Paula Marçal.

Durante diskusaun loron tolu ne'e deputadu sira Komisaun A Parlamentu Nasionál konsege aprova iha especialidade Kapítulu I kona-ba Medida Jerál ba Prevensaun ne'ebé mak kompostu husi Seksaun VIII no Artigu 25 no Kapítulu II kona-ba Rejime Deklarasaun ba Bens no Interesse foin mak hahú to'o Artigu 33.

Aleinde ne'e, JSMP mós apresia tebes konsiderasaun Prezidenté Komisaun A, distintu deputadu Joaquim dos Santos ba prezensa JSMP nian relativamente asuntu sira ligadu ho serbisu no sentensa sira tribunál. Nune'e mós adjuntu Komisáriu CAC, Sr. Luis de Oliveira Sampaio bazeia ba deskobrimentu sira JSMP nian, fundamenta dekobrimentu balun hosi distinta deputada Carmelita C. Moniz nian ligadu ho artigu 14. 4 pontu d

kona-ba medida sira atu reduz oportunidade korrupsaun iha setór judisiariu. Tuir deputada ne'e, iha kazu ne'ebé kuaze hanesan maibé deferensia boot tebes iha pena.

Ho nune'e nia konsidera sériu no atu evita kazu hanesan ne'e labele akontese tan iha futuru deputadu sira friza tan artigo 14. 4) pontu d) kona-ba *A aplicação de medidas com vista a reduzir injustificáveis variações nas sentenças.*

JSMP espera katak ho vontade política husi deputadu sira hotu nian, iha tempu badak Timor-Leste bele iha ona Lei Anti Korrupsaun hodi bele haforsa serbisu instituisaun relevante sira-nia serbisu ba kombate korrupsaun.

Tuir agenda, Komisaun A sei kontinua diskute kontinuasaun ba projetu Lei Anti Korrupsaun ba capítulo II kona-ba Rejime Deklarasaun ba Bens no Interesse iha 01 to'o 04 Jullu 2020, iha Munisípiu Aileu.

Atu hetan informasaun liutan favór kontaktu:

Ana Paula Marçal

Diretóra Ezekutiva JSMP

Diresaun e-mail: ana@jsmp.tl

info@jsmp.tl

Website: <http://jsmp.tl>